

Phaphamani Ngokufaneleyo Ningoni



F. T. Wright

Phaphamani Ngokufaneleyo Ningoni

F.T.Wright

Ikhishwe ngo: Januwari 2014

Lencwajana iguqulelwe olimini lwesiZulu nguNtombifuthi Winnie Gamede esizana noJennifer Zulu kanye noPhumzile Mongeka.

Kulencwajana kusetshenziswe igama elithi amava elithathwe olimini lwesiXhosa. Isizathu sokusetshenziswa kwalo yingoba selamukeleka olimini lwesiZulu futhi aliniki ukudideka kulowo olizwayo nolifundayo. Igama elithi intshumayelo elisetshenziswe kulencwadi liyefana nalelo elithi isigijimi. Womabili achaza into eyodwa.

Izincwadi okucashunywe kuzo

Izicaphuno ezikulencwadi zithathwe eBhayibhelini lesiZulu nasezincwadini ezilandelayo ezabhalwa nguE.G.White.

- Bible Studies on the Book of Romans, 1981
- The Desire of Ages, 1898
- Patriarchs' and Prophets, 1890
- Steps to Christ, 1892

Phaphamani Ngokufaneleyo Ningoni

“Phaphamani ngokufaneleyo, ningoni; ngokuba abanye kabamazi uNkulunkulu; ngisho lokhu ukuba nibe namahloni.” *I KwabaseKorinte* 15:34.

Lamazwi ayengabhalelwe umoni ongenamahloni nongamazi uNkulunkulu. Kepha ayebhalelwe amalunga ebandla lamaKristu ayehleli ngokuzikhohlisa ecabanga ukuthi ahambisana nezinga eliphakeme lobungcwele, enethemba lokuthola indawo ePharadesi njengawo wonke umuntu. Ibandla laseKorinte lasungulwa ngumpostoli onamandla uPawulu. Ekuqaleni kokusungulwa kwalo laliyibandla elalinamava ajulile esimoya, kepha ngokuhamba kwesikhathi lahlehlela nyovane labuyela empilweni ‘yokuhlonipha’ isono. Labo okwakufanele babe ngukukhanya okusindisa izoni emhlabeni, bona ngokwabo base bedinga intshumayelo ethi: bahlukane nesono baphile impilo yokulunga.

Nanamuhla lentshumayelo isabhekiswe ebantwini abakulesigaba. Ngakho-ke mntwana ozibiza

ngokuthi ungokaNkulunkulu, ngaphansi komfutho kaMoya oNgcwele, lamazwi afuna uhlolisise ngokucophelela amava empilo yakho yokukholwa; ubheke ukuthi unalo yini ulwazi lukaNkulunkulu oluholela ekuphileni impilo engenasono.

Abantu bavamise ukuyithatha njengento engenzeke intshumayelo ethi ‘ungoni’. Imbangela yalokhu ngukukholelwa kwabo enkololweni eyize nesabalele wonke umhlaba ethi: akekho umuntu ongaphila impilo engenakona. Intshumayelo ethi ‘ungoni’ iliqiniso futhi ivela kuNkulunkulu ngokunxusa uyiqondise ebantwini. UNkulunkulu, unguNkulunkulu olungile, onothando nongcwele. Ngakho-ke angeke anxuse ukuthi abantu baKhe benze izinto abangenawo amandla namakhono okuzenza. Kuzo zonke izimo lapho uNkulunkulu enxusa khona abantu ukuthi benze okuthile ubanika amakhono namandla okukwenza lokho. Intshumayelo yaKhe ethi ‘*phaphamani ngokufaneleyo, ningoni*’, akufanele ithathwe njengengcindezelo ayiqondise ebantwaneni baKhe. Kunalokho kufanele yamukelwe njengesipho

esingenakulinganiswa ngentengo asiqondise kubo. Kuyinhloso yaKhe “...ukuqeda iziphambeko, izono, ukudala ukubuyisana, nokungenisa ukulunga okungunaphakade...” enhliziyweni nasempilweni yomuntu ngamunye okholwa kuJesu. *Daniyeli* 9:24.

Kepha, njengabazalwane bamandulo baseKorinte abathi ngokweswela ulwazi lokusindisa kwamandla kaNkulunkulu bathatha isono njengesitha esinganqobeki, kanjalo nomntwana ophila esikhathini sanamhlanje nozibiza ngokuthi ungokaNkulunkulu wamukele isono njengengxenye yempilo yakhe. Kulaba abanje, uNkulunkulu ngothando, uqondisa ukuncenga kwaKhe kubo uthi, *‘phaphamani ngokufaneleyo, ningoni.’* Inhloso yaKhe ukuthi kungabibikho umuntu owamukela impilo yesono njengendlela yokuphila. UNkulunkulu onamandla ufisa ukuthi umuntu ngamunye abe nolwazi oluphelele oluthi: impilo elungile ingeyawo wonke umuntu ophendukayo akholwe kuYe.

Uma uJehova esimema ethi, ‘*singoni*’ akaqondisile emzuzwini onenkazimulo ozokwenzeka enkathini ezayo, wenzeka ngomlingo othile lapho okholwayo ezozithola esekhushulelwe esimweni sobumsulwa nobungcwele engeke esona. UJehova ukhuluma ngenkathi yamanje uma ethi *phaphama ungoni*. Nanxa kubukeka kungakholeweki lokhu kepha uNkulunkulu akasithathi njengesizathu sokuqhubeka nokona ukuzalelwa esonweni.

UNkulunkulu unalo lonke igunya lokunxusa ukuthi umuntu aphaphame ashiye izono azenzayo, ngoba ngamandla aKhe onke angapheliyo wenze ukuthi ukusindiswa ngevangeliki likaJesu Kristu okuwuhlelo lokwelapha olwenzelwe ukubuyisa ukuxhumana phakathi kwaKhe nomoni naphakathi komoni nomthetho waKhe, kutholakale kuwo wonke umuntu owelula isandla abambelele kukho. UMdali ukwenze ngokugcwele ukuhlinzeka ukuze umuntu akwazi ukufana naYe. Kuyinkazimulo nenjabulo kuYe ukukufezekisa lokhu kulabo abangaphikeleli nokwenza intando yabo egcina ngokuchitha umsebenzi waKhe womusa. Ukuze ifezeke lenhloso uNkulunkulu

wathumela iNdodana yaKhe ezelwe yodwa emhlabeni njengokuloba kwemibhalo ukuthi, “uzakuzala indodana uyiqambe igama lokuthi uJesu, ngokuba nguYe oyakusindisa abantu baKhe ezonweni zabo.” *NgokukaMathewu 1:21.*

UKristu akathunyelwe *ukusindisa abantu ukuze baqhubeke nokuhlala ezonweni zabo*, kepha uthunyelwe ukuthi *abasindise ngokubakhipha ezonweni zabo*. Ziningi izichasiselo zemicabango ezisabalele nezinika insindiso, kepha singaqinisekisa ukuthi umsuka wazo awuphumi engqondweni kaNkulunkulu. “Owenza isono ungokaSathane, ngokuba uSathane wona kwasekuqaleni. INdodana kaNkulunkulu yabonakaliswa ngalokhu, ukuze ichithe imisebenzi kaSathane.” I *Johane 3:8*.

USathane usebenza ngokungakhathali ukudala isono empilweni yomuntu. Amanga akhe aphumelela ngawo athi: angeke kwenzeke ukuthi abantu abawele esonweni bakwazi ukulalela imithetho kaNkulunkulu. “USathane wethula umthetho kaNkulunkulu wothando njengomthetho

ogcwele umina. Uthi angeke sikwazi ukufezekisa izidingo zawo.” *The Desire of Ages*, 24.

Iqiniso likaNkulunkulu elimsulwa neliphelele limile liphikisana nalamanga asabekayo. UNkulunkulu uthi, “ngokuba lomyalo engikuyala ngawo namuhla awulikhuni kuwe, awukude. Cha izwi liseduze kakhulu nawe, lisemlonyeni wakho nasenhliziyweni yakho ukuba ulenze.” *Duteronomi* 30:11,14. Le ingenye yezinkulumo uNkulunkulu aqinisa ngayo ukuthi ukulalela yinto engenzeka kokholwayo. “Anifikelwanga ukulingwa okungenjengokwabantu; kepha uNkulunkulu uthembekile, ongayikuvuma ukuba nilingwe ngokungaphezu kwamandla enu, kepha oyakuthi kanye nokulingwa anenzele indlela yokuphunyuka, nize nibe namandla okukuthwala.” I *KwabaseKorinte* 10:13.

Umuntu ngamunye kufanele akhethe phakathi kokulandela inkohliso kaSathane nokulalela uNkulunkulu. Bambalwa kakhulu abantu abakuqondayo ukuthi lembulwe lonke iqiniso maqondana nempikiswano ephakathi kokulunga

nokungalungi. Iningi labantu liyehluleka ukubona inkohliso kaSathane ethi: akekho umuntu ongazuza impilo enokulunga. Ngakolunye uhlangothi, uNkulunkulu uthi kungenzeka. Okudabukisayo ukuthi iningi lalabo abazibiza ngamakholwa, liyamkholwa uSathane, limsekele liphinde lifundise namanga akhe.

Uma lamakholwa engakubona okuzokwenzeka ngenxa yokunquma ukulalela inkohliso kaSathane, angayibuyekeza ngokushesha inkolo yawo. Ukukholwa ukuthi angeke sinqotshwe isono kungukuqinisa ubukhulu bukaSathane kunoBaba neNdodana noMoya oNgcwele, futhi kungukugcizelela ukuthi isono sinamandla amakhulu kunokulunga. Ukhona yini umKristu oqotho ongavumela imicabango enje ukuthi ithole indawo engqondweni yakhe na? Ngokuqinisekileyo akekho! Ngubani ngaphakathi kwenu ongaphimisela izimvo ezinobubi obungaka!

Nanxa kunjalo, baningi abathanda ukuthi amava abo empilo yobuKristu abe yindlela yokulinganisa iqiniso, abakhala ngokungaphumeleli kwezindlela

zabo ukunqoba isono. Uzwa umuntu ethi, 'sengizame kaningi ukwehlukana nesono!' Sekukaningi ngizunikela kabusha kuKristu, ngithatha nezinqumo zokuthi angeke ngiphinde ngone! Ngilwile impela nesono, ngokuzisola ngasivuma, ngacela nosizo. Awu! siphinde sanginqoba. Uma ngifunda isahluko 7 encwadini yaba*Roma*, ngisithola kuyisithombe esiphelele nesidabukisayo samava empilo yami yobuKristu! Iyini inkinga yami na? Iyiphi indlela umuntu afinyelela ngayo esimeni sokuphila impilo engenakona na?

Uyakwazi okulungile, futhi ngamandla akho onke *ulangazelela* ukukwenza. Pho-ke kungani lelizamo yakho ingahlangatshezwa yimpumelelo na?

Inkinga ngokuthi ushisekela ukwenza into enhle ngokusebenzisa izindlela eziphambene nezikaNkulunkulu. Lezindlela ozisebenzisayo angeke zikulethele impumelelo uma umuntu omdala esaphila ngaphakathi kwakho. Kudingeka ukuthi umuntu omdala akhishwe empilweni yakho

kufakwe omusha. Ngamanye amagama kudingeka kukhishwe imbewu yobubi kuqala. Impilo endala ‘ngumuntu omdala’, akuwona umzimba owakhiwe ngenyama negazi, kepha inzalo kaSathane ehlala egazini nasenyameni ewele esonweni, enokona, efayo nebusa ngokuphikisana nezifiso zengqondo nokukholisa kukanembeza. Le ‘yimpande’ yobubi empilweni, ‘umthombo’ wesono. Uma okungemsulwa kusaphila, umthombo lapho kuqubuka khona, nawo uzoba ngongahlanzekile. “Umthombo wenhliziyo kufanele ube msulwa ngaphambi kokuthi okugeleza kuwo kube msulwa.” *The Desire of Ages*, 172.

Amandla anonya nobubi eBhayibhelini abizwa ‘ngomuntu omdala’, *KwabaseRoma* 6:6; ‘Ingqondo yenyama’, *KwabaseRoma* 8:7; ne ‘nhliziyo yetshe’, *Hezekeli* 36:26. Lamandla aphinde afanekiswe nesihlahla sameva, nesono esigqilaza umuntu ngesihluku nangonya njengoba kwenza abaseGibhithe ekubuseni kwabo abakwaIsrayeli. Inyama iphenduka “...izikhali zokungalungi...” *KwabaseRoma* 6:13.

Iqiniso elibalulekile nelingaqondisiswa kahle namuhla lithi: ayisho lutho indlela enhle olizwisisa ngalo iqiniso eliqukethwe eBhayibhelini kanye nentshisekelo onayo yokufuna ukunqoba isono. Uma umuntu omdala esaqhubeka nokuhlala ethempelini lomphefumulo, “ukuphaphama ngokufaneleyo, *ungoni*.” angeke kwenzeke. IBhayibheli likubeka ngokusobala nangokukugcizelela lokhu ukuze kuqedwe intandabuzo nokuphikisana. “Ngokuba ukunaka okwenyama kungubutha kuNkulunkulu, ngokuba akuwuthobeli umthetho waKhe, yebo futhi kungewenze.” *KwabaseRoma* 8:7 “...umthetho awukwazi ukumlungisa umuntu, ngokuba *esimeni sakhe semvelo* yokona, angeke akwazi ukuwugcina...” *Patriachs and Prophets*, 373.

Nanxa kunjalo, kuvamile ukuthi umuntu azame ukugcina umthetho esesengaphansi kokucindezelwa yisono. Lokhu ukwenza ngokusebenzisa inkuthalo ukukhulisa imikhuba emihle negculisayo. Uphinde asebenzise impoqo, impatho eqinile, imfundiso, usiko kanye nezinye izindlela ukudala ukuxhumana nokuzwana

phakathi kwakhe noNkulunkulu. Yonke lelizamo ayilethi impumelelo. Kunalokho iletha isimo sokuziphatha okuhle kwangaphandle okungahlohlazelwa inguquko yangaphakathi. Lokulunga kwangaphandle angeke kukwazi ukufihla ukuqhubeka kokonakala okungaphakathi. Nanxa impatho eqinile, ukuqeqeshwa, imfundiso kanye nosiko kunendima ethile okuyenzayo, kepha akunawo amandla okudala impilo engenasono.

Kungukuchitha isikhathi ukuqhubeka nezindlela ezingasebenzi, futhi kungubulima ukufinyelela esiphethweni esithi: izithembiso nemigomo yeBhayibheli akutholakali. Impilo engenasono iyizinga uNkulunkulu alibekele abantu baKhe futhi akukho okunye okulungiselela umuntu ukuthi angene embusweni ngaphandle kwayo. Yingakho kufanele kutholakale indlela ezokwenza ukuthi umuntu, *‘aphaphame ngokufaneleyo angoni.’*

Kunesixazulo esisebenzayo ekumnikeni udumo uNkulunkulu. Lesixazululo sivela ebungcweleni, sembulwe emibhalweni asiveli emntwini. Nanxa

lesixazululo sinamandla futhi sicacile kodwa iningi labantu lisazixakekisa ngokwenza imizamo ephoqelela imvelo endala ukuthi ilalele. Ngokwenza kanje kwabo balahlekelwa isixazululo esinikwe nguNkulunkulu nesisebenza ngokweqiniso ekuxazululweni kwenkinga yesono. Yingakho iningi labantu lisebuthongweni bokuncika ngokulunga nasehlazweni lokungabi nolwazi lweqiniso lukaNkulunkulu, yize lizibiza ngabantwana baKhe.

Kubukeka sengathi kunezixuku ezintathu zabantu abazibiza ngamaKristu emhlabeni. Esokuqala isixuku, esalabo abathi umuntu angeke aphile ngaphandle kwesono. Esesibili siyavuma ukuthi umuntu angaphila ngaphandle kwesono, kepha asiyazi indlela kaNkulunkulu yokufinyelela kulesimo. Lesixuku sizakhela eyaso indlela yokukhululwa kepha ayisebenzi. Isixuku sokugcina, siyakholwa ukuthi singasuswa isono futhi siyayizwisisa nendlela esingafinyelela ngayo kulamava.

Uma kunje, yisiphi-ke isixazululo esingcwele okungeke kutholakale umcwana wokwenza komuntu kuso na? Indlela kaNkulunkulu yokuxazulula inkinga ngukukhipha isisusa sayo. Njengoba umlimi ekhipha inkinga yameva ensimini yakhe ngokuthi akhiphe isihlahla sameva, endaweni yaso afake esifanele, noNkulunkulu uthi uzokhipha umuntu omdala, endaweni yakhe afake umuntu omusha. Njengoba besenza imisebenzi yokungalungi *ngokwemvelo* engakakhishwa umuntu omdala, uma esekhishiwe sesizoyenza *ngokwemvelo* imisebenzi yokulunga. Kuzogcwaliseka ukuthi, "...uma simlalela sizobe sesenza lokhu okulungile nokuyimvelo yethu yesibili." *The Desire of Ages*, 668.

Akekho umuntu ongakhonza amakhosi amabili ngesikhathi esisodwa. Kufanele akhethe phakathi kokunikeza inkonzo yobugqila kumuntu omdala okuyinzalo kaSathane noma akhonze uNkulunkulu ngenhliziyo evumayo nenothando, ngokulandela imvelo entsha esifakwe kuye. Uma umuntu ebheka isithelo esingumphumela wempilo yakhe, unakho ukubona ukuthi uyisisebenzi

sayiphi inkosi. Uma engahlukani nokwenza isono asaziyo, engakhombisi nezithelo ezimtoti zikaMoya, uzokwazi ukuthi usesebugqilini besono. Ngakolunye uhlangothi uma ekhombisa impumelelo yokunqoba isono ngasinye asaziyo, ukuncika obubini kungaseyona ingxenye yempilo yakhe, ezithola egcwaliswe ngomoya wothando, wenjabulo, woxolo, nowokuzithoba, uzokwazi ukuthi usedlulile ekufeni usengene ekuphileni, usephenduke umntwana kaNkulunkulu ngokweqiniso.

Umuntu omdala angeke afundiswe noma aphoqwe ukuthi alalele uNkulunkulu. Akwenzeki, kufana nokuzama ukuthi impisi iphile impilo yemvu, noma isihlahla sameva sikiphe umvini. Impilo entsha kufanele ifakwe endaweni yempilo endala, njengoba nesihlahla esihle kufanele sitshalwe endaweni yesihlahla esibi, uma kufunwa isithelo esihle.

Umdala u-Elder E.J. Waggoner walibeka lacaca leqiniso: “akukaze kubenesikhathi empilweni yomuntu lapho yena ngokwakhe ekhombisa

amandla okumelana nokulingwa. Angeke akwenze lokho. *Lokhu ngubufakazi bokuthi kufanele sibe nempilo ehlukile kunaleyo esizalwe nayo ukuze sizokwazi ukumelana nesono.* Leyompilo kufanele kube engathintwanga yisono nengeke yathintwa yiso.” *Bible Studies on the Book of Romans*, 33, 34, 1981 Destiny Press edition.

Yinye kuphela impilo enje ekaKristu. Lowo onalempilo unokunqoba ngaphakathi kwakhe, ngoba ingukunqoba. UKristu uzimisele ukunika umuntu ngamunye ovumela ukuthi uMoya oNgcwele ayitshale ngaphakathi kwakhe lempilo. Kodwa lenkonzo yasezulwini angeke yenziwe emntwini ongavumi ukunikela umuntu omdala ekufeni. UKristu angeke avume futhi akakwazi ukwabelana inhliziyo nenye inkosi. Kufanele okholwayo abe ngowaKhe ngokupheleleyo noma angabi ngowaKhe sanhlobo. Ayikho enye indlela uKristu angaletha ngayo insindiso kumoni ngaphandle kwale.

Uma uqaphela ukubaluleka kokutshalwa kwempilo yokulunga kukaKristu ngaphakathi

kokholwayo, kufanele umehluko phakathi kwezenzo zesono, *okuyizono zenyama* kanye nesono, okungu 'mthetho wesono' enyameni uzwisisiseke. Izenzo zesono ziyizithelo zomthetho wesono osenyameni. UNkulunkulu uyazixolela izono ezenziwe ngumuntu. Kodwa ukuxolelwa kwezono angeke kuyixazulule inkinga yomuntu omdala. Sinye kuphela isixazululo esingaletha impumelelo, ngesokukhipha umuntu omdala kufakwe umuntu omusha endaweni yakhe. Umphefumulo odingayo kufanele uyiqondisise inkinga ukuze uzozuza lokhu. Futhi ukholelwe kulokho iNkosi ethembise ukukwenza, uphinde ube nolwazi ngeqhaza lawo ekuxazululweni kwenkinga.

Njengoba sekukhonjisiwe ngenhla, inkinga ngukuphila komuntu omdala. UNkulunkulu uthembisile futhi ukulangazelela kakhulu ukukhipha lenkinga ngokusebenzisa amandla aKhe angcwele. Uma sewenziwe lomsebenzi othatha umzuzwana, uNkulunkulu utshala imbewu kaKristu engcwele enhliziyweni.

Okholwayo kufanele abambe elakhe iqhaza ngokuvuma imbangela yenkinga yakhe okungeyona izenzo zesono, kodwa okungamandla abusa ngempopo ngaphakathi kwakhe okungumuntu omdala, oyinzalo kaSathane. Ngemuva kokuvuma, kufanele ayinikele eNkosini lenkinga, ngokukholwa ukuthi izoyikhipha, endaweni yayo ifake impilo yaYo engcwele. Emva kwalokho okholwayo angajabula ngokuthi useyindodana kaNkulunkulu futhi uhlanganyela nabantwana baKhe.

Yilabo kuphela abacela ngokukholwa abazoxolelwa izono zabo. Ngokufanayo, yilabo kuphela abakucela ngokukhethekile ukukhululwa kumuntu omdala, abazosithola lesipho. Ngeshwa, abantu abaningi bagxilise amehlo abo ezonweni zenyama ezisobala, abanakile ububi obucashile obuyimbangela yezinkinga zabo. Yikho kanye lokhu uSathane akufunayo, ngoba uyazi ukuthi noma yimuphi umzamo wokuhlanza isono angeke umenze umuntu abe nokulunga. Ukunqoba kutholakala kuphela ngokukhishwa kwempande yesono.

Ngokwemvelo, umuntu omdala angeke avele avume ukuphuma endaweni yakhe. Kufanele akhishwe. Awekho amandla ombuso athi engekho ngaphansi kwengcindezi yokudeda ebukhosini, avele avume ukukhishwa esikhundleni sawo, ekhishwa amanye amandla ombuso olulana kunawo. Pho-ke yimaphi lamandla amakhulu adingekayo na? Ngokuqinisekileyo akuwona amandla omuntu. Impilo yobugqila bokubuswa yisono ingubufakazi bokuthi umuntu *akanawo* amandla okuxosha ububi. Ukukhululwa akuzuzwa ngamandla omuntu, kuzuzwa ngokufa komuntu omdala kuphela.

Ngamandla kaNkulunkulu kuphela akwazi ukubhekana nesono. Yilamandla awanike umuntu ngevangeli likaKristu elisindisa esonweni. Lamandla angena empilweni abhekane nesono size sithambe siphume.

Abantu abaningi bayakunqikaza ukuza kuNkulunkulu ukuze bathole ukukhululwa esonweni ngoba banomuzwa wokuthi uYenqena

ukubakhulula. Kodwa iqiniso lithi uNkulunkulu uyakulangazelela ukubakhulula esonweni. Uyadumala uma bemlindisa. Kufanele ukuthi umuntu ngamunye akubeke eceleni ukunqikaza kwakhe ayocela ukukhululwa emandleni esono kuNkulunkulu. Yeka injabulo ezogcwala enhliziyweni kaBaba! Nanxa iNkosi iphuza ukuphendula imikhuleko ethile, kepha ivame ukunika impendulo esheshayo esicelweni seqiniso sokukhululwa ebugqilini besono. “Ngokuba lokhu kuyintando kaNkulunkulu, ukungcweliswa kwenu...” *I KwabaseThesalonika 4:3*

“Kwezinye izimo zokuphiliswa uJesu akazange asinike ngaleso sikhathi isibusiso esasidingeka. Kepha esimeni sochoko, kwathi isicelo siqedwa ukwenziwa ukuphiliswa kwanikwa ngaso lesa sikhathi. Uma sikhulekela izibusiso zasemhlabeni, izimpendulo zemikhuleko yethu zingaphuza ukufika noma uNkulunkulu asinike okunye kunalokho esikucelile [ngokuya ngokwecebo laKhe], kepha akunjalo uma sicela ukukhululwa esonweni. Kuyintando yaKhe ukusihlanza

esonweni, nokusinika ikhono lokuphila impilo engcwele.” *The Desire of Ages*, 266.

Ngakho-ke kulotshiwe ukuthi uNkulunkulu uthembisile ukukwenza ngokushesha lokho avumayo nanamandla okukwenza. Owethu umsebenzi ngukukholwa izithembiso samukele isibusiso esisinikwayo.

INkosi ithanda ukuthi siziqondisise lezimiso, size kuYo sizosindiswa, ngoba isikhombisile indlela ngemifanekiso eminingi, omunye wayo ngumshado. Lomfanekiso usencwadini yaba*Roma* 7:1-4.

“Kanti anazi yini, bazalwane, ngokuba ngikhuluma kwabazi umthetho, ukuthi umthetho uyabusa phezu komuntu ngesikhathi sonke esekhona na? Ngokuba owesifazane oganileyo uboshelwe ngomthetho endodeni isekhona; kepha nxa isifile, ukhululiwe emthethweni wendoda. Ngelokho-ke lapho indoda isekhona, uyakuthiwa isiphingi, uma eba ngowenye indoda; kepha nxa indoda isifile ukhululekile emthethweni, angebe yisiphingi, uma

eba ngowenye indoda. Kanjalo nani bazalwane bami, nani naba ngabafileyo maqondana nomthetho ngomzimba kaKristu ukuba nibe ngabomunye, lowo owavuswa kwabafileyo ukuze sithalele uNkulunkulu izithelo.”

Kulezindimana kubekwe ngokusobala ukuthi kunabayeni ababili, owokuqala uSathane nenzalo yakhe. Owesibili uKristu ovuswe ekufeni. Inzalo yomyeni wesibili emiBhalweni ibizwa ‘ngomuntu omusha’ inzalo yomyeni wokuqala ibizwa ‘ngomuntu omdala’.

Kunephuzu eligcizelelwe ngaphezu kwamanye kulezindimana elithi: akekho umuntu ongaba nabayeni ababili nenzalo yabo ngesikhathi esisodwa. Angeke wenzeke umshado nomyeni wesibili engakhishiwe umyeni wokuqala.

Lowo ofuna ukusindiswa akayedwa uganile, ngakho-ke akekho esimweni sokulalela uKristu ngokungena ebudlelwani bomshado naYe. Uma kunobudlelwane okufanele benziwe *kufanele uchithwe kuqala lomshado okhona.*

Kunabashumayeli namuhla abayibonayo imvelo embi yomyeni omdala. Babuchaza kahle ububi, ulunya, ukungcola nezinye izimpawu zakhe zobubi. Bayiveza ngokusobala inzalo yakhe engumona, ukuzikhukhumeza, inhliziyo embi, intukuthelo, kanye nokunye. Bayasho ukuthi konke lokhu akufanele kube ngamava omzawlwane. Emuva kwalokho baphinde badonsele ukunaka kwabantu ebuhleni, emandleni, ekulungeni, nasekupheleni kobungcwele boMyeni wasezulwini onguJesu Kristu. Baphinde bakhuthaze amalunga amabandla abo ukuthi ameme uKristu ezinhlizyweni zawo. Banika amabandla abo isiqinisekiso sokuthi uMsindisi uyakwazi ukukhuza lesimo aphinde avimbe nokubonakala kobubi obungaphakathi, kepha abakhulumi ngesidingo sokukhululwa kulomshado wokuqala. Kunalokho bathi ububi bomuntu omdala kufanele buhlale ngaphakathi komuntu kuze kufike ilanga lokuvuswa kwabafileyo. Lendlela yokuphila ichazwe ngumbhali othile encwadini enesihloko esithi, *Living with the Tiger*.

Labo abalandela leseluleko kuyabaxaka ukuthi kungani pho bengenawo amava athenjisiwe okukhululeka nanxa isizathu sisobala. UKristu ulungile futhi uyahlonipheka. Ngakho-ke angeke azibandakanye nobudlelwane bokuphinga. Angangena kuphela endaweni uma umyeni omdala esekhishiwe ngoba akakwazi ukwabelana indawo naye. Futhi angeke amukele abantwana bomubi ngokusebenzisa amandla aKhe ukubenza bamlalele. UNkulunkulu akanayo intakazelelo ekulaleleni okuphoqiwe. Uyazi ukuthi inzondo engaphansi kokulawulwa akulona uthando, njengoba nempisi evalelwe esibayeni ingeyona imvu.

Labo abakushiya ngaphandle ukufa komuntu omdala nabaqinisekisa ukuthi kufanele siphile nemvelo yakhe ngaphakathi kwethu aze abuye uKristu, bashumayela ukuphinga kwesimoya. Kufanele babizwe ngabafundisi bokungalungi. Isiphetho sabo sizofana nemisebenzi yabo, lapho bebhekana nokujeziswa okwesabekayo okuzokwehlela labo abaholele imiphefumulo ekulahlekeni.

Ngenxa yokuthi uSathane ungumyeni ongekho emthethweni, futhi ungumbulali ogwetshiwe, lokho kunika uKristu ilungelo lokumsusa esikhundleni sakhe sokuba ngumyeni noyise wemvelo yethu yangaphakathi yokungalungi. Esiphambanweni eKalvari, uJesu wasinqoba isitha. Ukusinqoba kwaKhe kwamnika ilungelo eliphelele lokusibiza abakhe nxa sibalekela kuYe.

AmaKristu akufanele abheke uSathane njengesitha esisazonqotshwa, kunalokho kufanele ambheke njengesitha esesinqotshiwe. Ukunqoba okwazuzwa nguMsindisi onamandla kufanele okholwayo akuthathe njengesipho. UPawulu wakuqondisisa kahle lokhu ngenkathi ebhala ethi: “kepha makabongwe uNkulunkulu osinika ukunqoba ngeNkosi yethu uJesu Kristu.” I *KwabaseKorinte* 15:57. “Ngokuba inkokhelo yesono ingukufa, kepha isipho somusa kaNkulunkulu singukuphila okuphakade kuKristu Jesu iNkosi yethu.” *KwabaseRoma* 6:23.

Ngakho-ke akekho umKristu oya empini eyonqoba uSathane. Uma enza kanjalo angeke akuthole ukunqoba, kunalokho uzothola ukwehlulwa okubuhlungu. UmKristu weqiniso uthola ukunqoba kuqala, bese eyohlangabezana nesitha esesinqotshiwe. Uma ephila ngalesipho esihle, angeke kwenzeke ukuthi ehlulwe.

Ukusebenza kulelizinga lempumelelo nokunqoba kusho ukuphila ngokukholwa kuphela, njengoba kulotshiwe ukuthi, “kepha olungileyo uzakuphila ngokukholwa kwakhe.” *Habakuki* 2:4; *KwabaseRoma* 1:17; *KwabaseGalathiya* 3:11; *Hebheru* 10:38.

Kubalulekile ukubona ukuthi ivangeli alisiwo amandla *kunoma ubani*, kepha lingamandla kulowo nalowo ‘*okholwayo*’. Bheka encwadini yaba*Roma* 1:16. Kulabo abangakholwa, liyisichasiselo semicabango, impikiswano noma imfundiso engaphikiswa engenamandla okuphilisa. Ngakho-ke labo abazothola insindiso kufanele bayazi indlela yokukholwa nendlela abangakusebenzisa ngayo.

“Kepha ngaphandle kokukholwa akwenzeki ukumthokozisa; ngokuba ozayo kuNkulunkulu umelwe ukukholwa ukuthi ukhona nokuthi unguMvuzi walabo abamfunayo.” *Hebheru 11:6*.

Ukholo oluphilayo nolusebenzayo kufanele luzuzwe luphinde lusetshenziswe yilowo nalowo ozothola indawo ePharadesi. Kunombuzo othi, umuntu ukuthola kanjani lokhu kukholwa na? Kuyinto engazenzakaleli enhliziyweni yomuntu, ngoba kufanele kutholwe, kuniselwe kuphinde kuqiniseke. Iningi labantu eleza kuJesu ukuzokwamukela ukuthintwa ngamandla aKhe aphilisayo labuyela emuva lungalutholile usizo ngoba lalingakholwa. Abanye abeza benokholo oluncane, njengalendoda yaseKapernawume okwasekusele kancane ukuthi indodana yayo ife, yabona umbono wamandla kuKristu adala ukuthi ukholo lwayo luphaphame, yakwazi ukubamba isibusiso esithenjisiwe.

Yinye kuphela indlela ukholo oluza ngayo, luza ngeZwi likaNkulunkulu. “Ngalokho-ke ukukholwa

kuvela ngokuzwa, ukuzwa kuvela ngeZwi likaKristu.” *KwabaseRoma* 10:17

Ukholo lwangeqiniso akuyona imizwa futhi aluncikile kuyo. Lwakhelwe phezu kweZwi likaNkulunkulu elingaguquki. Ngakho-ke isinyathelo sokuqala sokwakha ukholo ngukuzijwayeza izibusiso ezinhle zikaNkulunkulu. Lezithembiso kufanele zifunwe, zitholwe, zifundwe, zenziwe ingxenye yamava okukholwa empilo yomuntu. Kufanele sifundwe isithembiso ngasinye esingcwele size sibe yingxenye yomuntu, ngalendlela okholwayo uzowabona amandla aqukethwe yiso.

Umuntu ngamunye kufanele aqaphele ukuthi ukholo lwakhe angalwakheli phezu kwamava empilo yabanye abantu, ngoba lokhu akusona isisekelo samava empilo yobuKristu aphilayo. Ngolunye usuku kweza umuntu othile kimi egcizelela ukuthi izithembiso zikaNkulunkulu zinhle, futhi zilunge kakhulu. Lomuntu wayezimisele ukuzikholwa, uma nje ngimkhombisa umuntu oyedwa ophila impilo ephelele

ngokugcwaliseka kwazo empilweni yakhe. Lomuntu wenza okufanayo nokwenziwa ngabaFarisi basemandulo abacela ukuthi uJesu abakhombise uphawu olwaluzoba yisisekelo sokuMkholwa. Ukube uJesu walukhombisa uphawu olwalucelwa babengeke bamkholwe, naye lomuntu ubengeke akholwe yize noma ubengambona lomuntu oyedwa ayefuna ukumbona.

Watshelwa lomuntu ukuthi ukukholwa kwakhe akuncikile empumelelweni etholwa ngabanye ekusebenziseni izithembiso zikaNkulunkulu. Uma ngabe kwakunguyena yedwa umuntu emhlabeni okholelwa eZwini likaNkulunkulu, ubesosindiswa ngamandla aKhe kuleloZwi. Ngakolunye uhlangothi uma ezolindela ukuthi omunye umuntu aqinisekise ukusebenza kwezithembiso ngaphambi kokuthi akholwe futhi aphinde abusiswe yizo, kusho ukuthi uzofa esalindile uma kungatholakali muntu.

Indlela okufanele ukukholwa kutholwe kuphinde kusetshenziswe ngayo ikhonjisiwe emiBhalweni

ngentshumayelo kaKristu. Asikho isibonelo esihle nesidlula esalendoda eyayisechibini laseBethesda. Lendaba ilotshwe encwadini ka*Johane* 5:1-9.

EJerusalema kwakunechibi okususelwa kuyo lendaba yasemandulo. Abantukazana babekholelwa emangeni athi: uma lelichibi lizanyazanyisiwe, umuntu wokuqala ukungena kulo ngemuva kokuzanyazanyiswa kwalo wayesinda esifweni sakhe noma enasifo sini. Okuseqinisweni ngukuthi akekho umuntu owayegula ngempela owayeba ngowokuqala ukungena emanzini, ngoba abantu ababengena kuqala kunabanye yilabo ababecabanga ukuthi banokugula okuthile. Kucacile ukuthi lomcabango wawungaveli kuNkulunkulu, ngoba akuyona indlela yaKhe yokusebenza ukunika abaphilile amandla amaningi nokunika abangaphilile amancane ukuze bonke (abaphilile balinyazwe ngamandla amaningi abanikwe wona, nabangaphilile balinyazwe amandla amancane abanikwe wona) balinyazwe ngamandla abanikwe wona. Ngukukholwa emandleni kaNkulunkulu okuletha ukululama, akukona ubungcono

ngokwenyama okwenza ukuthi umuntu abe phambili kunabanye.

Eduze nalelichibi kwakukhona umuntu othile owayesegule iminyaka engu-38. Ngokusizwa ngabangane bakhe ababemfisela ukululama, wayesezame kaningi ukuthola ukuphiliswa ngokuthi abe ngowokuqala ukungena emanzini, kepha ngaso sonke isikhathi ubethi lapho esazama ukwehla, bese kwehla omunye ngaphambi kwakhe.

Isimo salomlisa ngokwenyama sifanekiswa nse nesomoni ngokwesimoya. Lomlisa wayenomzimba owawudalelwe ukuthi wenze imisebenzi ethile yemihla ngemihla yokuziphilisa futhi engqondweni yakhe yikho lokhu ayezimisele ukukwenza. Wayengafuni ukulala nje phansi abe lubhaca usuku nosuku engasebenzi. Wayelangazelela ukusebenza, ukwakha, ukutshala, ukuvuna, nokwenza noma yini impilo eyayingamnika kona, kepha ubengakwazi ukwenza zonke lezinto, ngoba ngaphakathi kwakhe kwakuhlala isono esasibusa amalunga omzimba wakhe ngokuphikisana nezifiso zengqondo yakhe.

Lesimo sifana nesomuntu okuhlala umuntu omdala kuye oyisono. Sonke sinamalunga omzimba adalelwe ukwenza imisebenzi yokulunga futhi yilokhu esifuna ukukwenza ezingqondweni zethu. Sifuna ukuba nothando, ukuba mnene, ukuba nomusa, ukuba noxolo, ukuba ngcwele, kepha ngaphezu kwezinhloso zethu ezinhle sizithola senza izinto esingafuni ukuzenza. Uma sifunda encwadini yabaRoma 7:14-25, sizithola sifunda ngesimo samava empilo yethu. Izinto esifuna ukuzenza asizenzi, senza lezo esizenyanyayo nsuku zonke. Inkinga ukuthi silawulwa yisono ngaphakathi kwethu, njengalomlisa owayebuswa ngukugula.

Iminyaka ngeminyaka lomlisa wazama ukuthola ukwelashwa ngendlela ethile, eyayingukungena echibini. Lendlela ayizange isebenze. Wazithola esegula futhi esebuthakathaka kakhulu ukudlula isikhathi aqala ngaso ukugula ngemuva kweminyaka engu-38. Ekugcineni walahla lonke ithemba lokuthola usizo ngokusebenzisa lendlela.

Ngendlela efanayo, iminyaka ngeminyaka nathi sifuna ukukhululwa ngokuzama ukwenza lokho okufunwa ngumthetho. Esikhundleni sokuletha imvelo endala engaphakathi kwethu kuNkulunkulu ukuthi ikhishwe, kufakwe entsha endaweni yayo, sizama ukuyilawula nokuyiqeqesha. Ekugcineni silahlekelwa yilo lonke ithemba lokuzuza ukunqoba ngalendlela. Ukuphelelwa kwethu ukuzethemba nokwethemba izindlela zethu zokuzikhulula esonweni, kunika uKristu ithuba lokungena asikhulule.

UMsindisi weza kuphela kulomlisa waseBethesda lapho eselahle lonke ithemba kuloluhlelo lwakhe ayebheke ukuthi lumsindise. Efika kuye uMphilisi wambuza ukuthi uyafuna ukuphila na. Lomlisa wacabanga ukuthi uKristu wayefuna ukumbamba amfake echibini uma liphinda lizanyazanyiswa, washesha ukumqinisekisa ngokuthi asikho isidingo sokwenza lokho, ngoba wayesekholisekile ngokuthi lomzamo angeke ube nezithelo. Lokhu ngukuvuma okwakulindelwe nguJesu, okwathi eqeda ukukuzwa, ngokushesha wamtshela ukuthi athabathe uhlaka lwakhe ahambe.

Lomlisa owayegula wayeseneminyaka
engazisebenzisi izinyawo zakhe, kanjalo kwakulula
ukuthi awahleke usulu amazwi kaJesu.
Wayengawachitha ngokuthi angeke enzeke, afane
nabaningi abaziphatha ngalendlela uma
befundelwa umyalelo osobala othi, “*phaphamani
ngokufaneleyo ningoni.*” Ngakolunye uhlangothi
wayengaphendula athi: “Maye! Nkosi, sengizwele
ngaWe! UnguMphilisi onamandla! Unika ukubona
kwabayizimpumputhe, unika abafileyo impilo,
uphilisa abanochoko, unika abaxhwalile
nababuthakathaka amandla. Ngiyazi unamandla
okungiphilisa. Ngilindile ngentokozo ukuzwa
amandla okusindisa kwakho engena emzimbeni
wami, uma sengiwazwile ngizowulalela
ngokushesha umyalo waKho.”

Kepha uJesu akazange athi kulomlisa,
“ngizokuphilisa, masinyane uzokuzwa ukuphila
namandla kungena emzimbeni wakho, lapho
ukuzwa, ume ngezinyawo zakho uhambe.” Wavele
wathi, “vuka, uthabathe uhlaka lwakho uhambe.”
Kwakungekona okwalomlisa ukubuza ukuthi
kungenzeka yini okwakushiwo nguJesu, noma

qha, ngokuba kwakungesiwo umsebenzi wakhe lowo. Lokho okushiwo nguJesu kuyenzeka, ukuyaleza kwaKhe ukunika amandla okuthi kwenzeke, ngoba akalokothi anike umuntu umyalelo ongeke wenzeke. Njengoba uKristu ethi kulomlisa asukume athabathe uhlaka lwakhe ahambe, ngokuqinisekileyo wamnika amandla okukwenza lokho. Ngokufanayo, njengoba ethi singaphinde sone, kulomyalezo waKhe kunesiqinisekiso sokuthi kuzokwenzeka.

Kwaba kuhle kulomlisa owayegula ukuthi awakholwe amazwi kaJesu, aphinde awasebenzise ngaphandle kokuthandabuza. Ngokushesha wathumela umyalezo ezithweni zomzimba ezazingasebenzi ukuthi ziseke isisindo sakhe, uNkulunkulu waletha umthombo wamandla okuphila emzimbeni wakhe, waphiliswa. Wasukuma wama ngezinyawo. Ukufa kwaxoshwa emzimbeni wakhe, ukuphaphama, impilo kanye namandla kwathatha indawo yakho. Wayesehamba *ngamandla ayesekuye*.

“Ngendlela efanayo ungumoni. Awukwazi ukuhlawulela izono zakho ozenze ngesikhathi esidlule, angeke uyiguqule inhliziyi yakho, uzenze ongcwele. Kepha uNkulunkulu uthembisile ukukwenzela konke lokhu ngoKristu.” *Steps to Christ*, 51.

Abantu angeke bakwazi ukuzihlawulela izono abazenzile futhi angeke bakwazi ukuzenza ngcwele. Kodwa kukhona abazama ukuzihlawulela. Labo bantu abazama ukuzihlawulela yilabo abazwisisa ukuthi bona angeke beze kuNkulunkulu bengahlanzekile. Ngakho-ke bazama ukuzihlanza ngokwabo ukuze baziveze ngendlela ehloniphekile uma beza kuYe. Iningi labantu liwuthatha njengento engeke yenzeke umcabango othi umuntu angaphila impilo engcwele emhlabeni. Kepha uNkulunkulu *uthembisa* ukukwenza ngcwele. Uma kunjalo, *kufanele ukukholwe* lokhu. Uma ukukholwa, usuthathe isinyathelo esinamandla esiqonde phambili sokukuzuza.

“Uyakholelwa kulesithembiso. Uzivumile izono zakho waphinde wazinikela kuNkulunkulu ukuthi

umsebenzele. UNkulunkulu uzogcwalisa iZwi lakhe kuwe. Uma usikholwa isithembiso, ukukholwa ukuthi usuxolelwe futhi usuhlanziwe, uNkulunkulu ukunika isiqinisekiso sokuthi usuphelelisiwe. Ukuphiliswa kwakho kufana nesikhathi lapho uKristu anika amandla koxhwalile ukuthi asukume ahambe, lomlisa owayexhwalile wakholwa ukuthi usephilisiwe wasukuma wahamba. Nakuwe kuzoba kunjalo uma ukukholwa. “Ungalindeli *ukuzizwa* usuphilisiwe, kepha ithi, “ngiyakholwa, kunjalo ngoba uNkulunkulu ukuthembisile, hhayi ngoba ngikuzwa emizweni yami .”

Kudingeka ukuthi unike ukuvuma ngendlela okulindeleke ngayo ezulwini, unganiki ukuvuma kwezenzo ozenzile kuphela. Okubaluleke kakhulu ngukuthi uvume lokhu oyikho. Ngoba umuntu akakhululwa ngezigaba ezahlukeni, ngokwesibonelo, ukusuka emoneni, kuye ekuzikhukhumezeni kuye olakeni olubi. Umuntu ukhululwa kanye kumuntu omdala.

Ukukhetha ukulalela imiyalelo kaNkulunkulu, kudinga okholwayo azinikele ayigcine ngaphandle kokukhathazeka imiyalo kaNkulunkulu. Uma uNkulunkulu emqondisa ukuthi ayenze, uyaqhubeka, ashiye inkinga yokugcwaliseka kwayo kuYe. Uma okholwayo efunda ukuhamba ngokukholwa kulendlela, unesiqinisekiso sokunqoba okuqhubekayo.

Abanye bayawaphikisa lamaqiniso amahle nasindisayo ngephuzu lokuthi angadala ukuzizwa nokuzethemba kumuntu okuzomenza azizwe engasamdingi uMsindisi. Leliphuzu lifana nobulima bokucabanga ukuthi uma owesifazane eseganile, angeke esayidinga indoda yakhe. Ukuncika komKristu kuKristu kuyaqhubeka akupheli ngokukhishwa komuntu omdala.

Umuntu angenze lutho ngaphandle kukaKristu. Ngakho-ke kufanele kuhlale kunokuxhumana okuphilayo phakathi komuntu noKristu. Ngoba uma kungekho umphefumulo uba buthakathaka ugcine ngokufa.

Ngesikhathi kukhishwa umuntu omdala kungena omusha, kusuke kungakatholakali ukukhula okuphelele kumKristu, ngoba okholwayo usuke esesengumntwana kulentshumayelo, kusesekuningi okufanele akufunde futhi akwenze. Usuke esengene kukho kokubili, emndenini nasesikoleni sikaKristu.

Njengelunga lomndeni, unikwa konke okudingekayo ukukhulisa nokusekela impilo entsha, kodwa ngumsebenzi wakhe ukuzondla ngalokhu uKristu akunikile. Kufanele abe nesikhathi esithile sokuxhumana namandla ezulu ekuqaleni kosuku ngalunye, ukuze impilo inikwe umdlandla, ukukhanyiseleka kwemibono kanye neso elibonela izilingo zesitha phambili namandla okumelana nazo.

Indlela yokukhipha yonke inkohliso kaSathane neyokufunda ingqondo kaKristu, iqala lapho usungumfundi esikolweni saKhe. Lomsebenzi awuzuzwa ngesikhashana nje. Udinga impilo yethu yonke ukuthi siwufeze. Umsebenzi omkhulu umzukuzuku wemicabango nemikhuba emidala

efuna ukubusa, kodwa uma umfundi efunda ukungakwethembi lokhu akufundile esikoleni sikaSathane ngesikhathi esingaphambili, kunalokho avule inhliziyo yakhe emfuthweni omtoti wabafundisi basezulwini, uzoba nokukhula okubonakayo empilweni yobuKristu.

Kuliqiniso, uSathane akadikibali. Nanxa esesizuzile uKristu, uSathane umelana naso sonke isinyathelo esisithathayo endleleni, esebenza ngokuzikhandla okukhulu ukuzama ukutshala ukunqikaza engqondweni. Uma nje engasiholela ekutheni singabaze izithembiso ezithembekile zikaNkulunkulu, nakanjani uzodala ukuthi sihlehlele emuva sibuyele esonweni. Uma kwenzeka lokhu, akusho ukuthi konke sekuphelile ngoba uNkulunkulu uyashesha ukusixolela, nokusihlanza ngokuphendula umkhuleko wokukholwa. UNkulunkulu akakuthathi ukulingeka njengesisekelo sokulahlwa, kepha ukuthatha njengesifundo esiqukethe umyalezo odala ukuthi isilingo sihlangatshezwe ngempumelelo uma uSathane esiletha ngesikhathi esizayo kithi.

Nanxa kukuningi kakhulu okungakhulunywa maqondana nalesihloko esihle kangaka, kepha okuningi osekuxoxwe ngakho lapha kuveza ukuthi uNkulunkulu wenze konke ukuhlinzeka kulowo nalowo othandayo, ukuthi *aphaphame ngokufaneleyo angoni*. Sekuyisikhathi sokukhipha isimo sokuthandabuza, nokungakholwa esinqanda abaningi ukuthi bangakwazi ukuphila impilo aYihlelele asebekhulekile. “Lowo ohlala kuYe akoni; lowo owonayo akambonanga, futhi akamazi.” I *Johane* 3:6. “Uma simazi uNkulunkulu njengoba kuyigunya lethu ukumazi, impilo yethu kuzoba yimpilo yokumlalela okunganqamukiyo.” *The Desire of Ages*, 668.

Ngosuku lokugcina abaningi abacabanga ukuthi bayamazi uNkulunkulu nabazithatha ngokuthi bangabantwana baKhe beqiniso, bazoba nomunyu badumale ingunaphakade njengoba kulotshiwe ukuthi bayothi, “...Nkosi, Nkosi asiphrofethanga yini ngegama lakho, sakhapha amademoni ngegama lakho, senza imisebenzi eminingi yamandla ngegama lakho, na? Khona

ngiyakufakaza kubo ukuthi, angizange nginazi; sukani kimi benzi bobubi.” *NgokukaMathewu 7:22-23*.

Ukwenza intando kaNkulunkulu kungukuhlukana nokona. Amandla kaNkulunkulu nokuhlinzeka kwaKhe kwanele ukwenzela ukuthi kungabikho izaba zokona. “Ukuziphatha okungcwele, impilo efuze ekaKristu, iyatholakala kuwo wonke umntwana kaNkulunkulu okholwayo aphenduke.” *The Desire of Ages*, 311.

Masinyane, akekho owaziyo ukuthi kuzokwenzeka ngokushesha okungakanani ukwahlulela kokugcina okwenziwa ukuhlolisisa imisebenzi yomuntu ngamunye. Uma leso sikhathi sifika, lizobe lingasekho, lingeke liphinde libuye futhi ithuba lokuthi umuntu asebenzise ikhambi elingcwele lokwelapha. Ngakho-ke namhlanje, ungakavalwa umusa, mntwana othandekayo nozibiza ngokuthi ungokaNkulunkulu oLungile, *PHAPHAMA NGOKUFANELEYO UNGONI*.

Back cover page:

Iningi labantu lamukela isono nobuhlungu obulethwa yiso njengesifo esingelapheke nesingebalekelwe. Ngesikhathi sikaJesu amaJuda amukela ukugula njengesifo esingalapheki. Kodwa uMsindisi wawakhombisa ukuthi awekho amandla

kungaba awokugula ngokwenyama noma
ngokwesimoya angamelana nomusa waKhe
osindisayo.

Lencwadi ikhombisa lokho abaningi
abakwamukela njengokungcono abangakwenzelwa
uNkulunkulu, okuqhelelene kakhulu nalokho
okusengqondweni yaKhe ngabo. UNkulunkulu
usinika amandla okuwugcina umyalelo waKhe
othi: singoni futhi umema imiphefumulo ukuthi ize
izokwamukela ukuhlinzeka okunamandla
akulungiselele abalahlekile nabenza okubi.

Lencwadi inika ithemba elisha emandleni
asindisayo kaNkulunkulu iphinde ikhombise
ukuthi impilo endala yokwehlulwa isono ngaso
sonke isikhathi ingakhishwa endaweni yayo
kufakwe impilo yokunqoba okunganqamukiyo.

**Nxa udinga ulwazi olunabile ngesihloko
okukhulunywe ngaso kulencwadi nangezinye
izihloko ezikhuluma ngendlela yensindiso
ungaluthola kulezincwadi ezilandelayo ezibhalwe**

nguF.T.Wright. Ezinye zazo ziyatholakala ngolimi lwesiZulu.

Acceptable Confession

Awake to Righteousness!

Behold Your God

Christ Coming Delayed, Why?

Child Salvation

Entering into God's Sabbath Rest

Facing the Judgement are you ready?

From Bondage to Freedom

God's Way in the Sanctuary

I Think as a Man

Revival and Reformation

The Living and the Dead

The Seven Angels

Three Temples